

December 2012

Hoap

Dat ouwe verhoal
Doezende kieëre vertild
Dat zelfde verhoal
Dat zelfde bild
Van sjtal,os en eëzel
De krub en 't kindj
En 't leed van de ingele
Gedrage doeër de windj
De wieze mit hun sjter
De herders, 'n sjoap
't bringt oane i-pot of tablet
Noa al die joare nog ummer hoap

Wiel Roeselers

Krismisgedachte

Sinterkloas geet nog doer de sjtroate
En had ,t landj nog neet verloate
Zien peërd nog neet in de sjtal gezat
Wurd in de winkele al krismeziek opgezat
De winkele ligke uëvervol
De krismisgedachte is op hol
't Is allang neet mieë,t fieës, van
Denneruëk en keërse
Plectic en uëverdaad uëverheërse
Ene kunjstof krissjtal en plectic bul
Alles prullaria en flauwe kul
vir geëve allenuij plankgaas
en zindj oos zelf neet mieë de baas
gene wit nog woeë 't om geet
de krismisgedachte is om zeep
'tzint neet d,r krisboom en de bul,
Mer de pieke die tille
Dat is wat vieër tegenwuërdig wille
't Bringt neet mieë ,t krismisgeveul op gank
Mer wat alleen nog tijld, pieke op de bank

Jan van Haaf

Went 't weer krismes is

Went is weer krismes is,
Lieëre vieër weer beseffe,
Dat de welt neet van os is,
En dat vieër os hie alleen treffe,
Om vuur os en de welt te zurge!
Dan is d'r altied plaatsj
vuur inne nuje murge!

Mér neet alleen mit de krismes
mot dat besef vuurop sjtoan,
Ooch de rest van 't joar motte vieër
handj in handj doeër 't leëve goan!

Ron Logister.

Krismes gedachte

Mit Krismes wuërd uëver de ganse welt gezonge "Sjtille nacht Heilige Nacht"
Dat Leëdje is 195 joar gelèje vuër't lejs doeër twiej Österiejkers ten gehuëre gebracht,
Franz Xavier Grüber en Josef Mohr diej howwe dat leëdje bedacht,
Dat teagewuërdig in alle talen en in al ziejn pracht,
Uëver de ganse welt wuërd gezonge in diej "Sjtille Heilige Nacht".

Krismes is `t fieës dat reupt geveulens op, `t makt os get weeker,
Dan wilt me get goot make mer hōbbe de durf neet, dat is zeejker,
Es dat zoë blif zal de vreëj d'r noëts komme,,
Me makt zich zelf get wiejs, en me hilt zich vuër de domme,
En wachte ààf Wea heat `t lef, en numt `t initiatief,
Op deez maneër blift joar noa joar de oëtsjlaag negatief.

Wat zow `t fijn zin es me zich ding vergeave,
En in vreëj same wiejer goan doeër `t leave,
Mer oane dea gooie wil lökt dat neet,
Dan blif de piejn besjtoan en oog dat verdreet,

Mer..d'r is ene dea kan doabiej helpe, hea heat diej macht,
Ziene naam wuërd bezonge in diej "Sjtille Heilige Nacht"
Hea zal os helpe en gieëf os de kracht
In diej "Sjtille Heilige Nacht.

Jan Theunissen

Krismis

Inne tied van rus en bezinning
Sjteet vuur de duër
Vier numme gaas truuk en
Houte os in van 't gejaag van jieëdere daag
Vruije vier os es kinjer op 't
Kommend gebuëre
Veuël te mekkelik vergit me de
Oeërsjpronkelikke zin van dizze tied!

Jan van Haaf

Krisnach

Loat os d'r vree veule dees nach
D'r vree va eevoud en oane kaal

Want ozze weëg lupt gans onverwach
Noa inne erme sjtaal

Loat os sjtil zieë in dees nach
En zjwiegend loestere
En wie ummer onverwach
Zich i eure leefde mage koestere

Jan Halmans

Uëverdoad

De pens vol sjroet
't ies krieg ich neet mieë op
Misselikvan sjokelaat
De sjampanje in der kop

De sjpeulsjtee vol kroam
Leëg flesje op 'n rie
'n Drekstuut vol kadopepier
Sjteet aa gen zie

Alles hul uëvertrul
De uëverdoad
Makt os krank
Vier kinne geen moat

Huër op mit deë palaver
Dink toch 'ns noa
Gedraag dich normaal
Dan zal 't beëter goa

Veul mit dien hart
Sjtil dich oape vuur de luuj
Dan gild 't verhoal van 't kindj
Ooch nog oppe daag van huuj

Wiel Roeselers

Kriskindj

In Betlehem is't Kriskindj geboare
Maria en Jozef woare oetverkoare
Is geboare in ene kouwe sjtal
Mer 't nuuts kump uëveral
De ingele dont 't zinge
En 't nuuts va 't Kriskindj bringe
Op sjtruë in ee krub woeë't kindj in lik
Woeë de os en de eëzel neëve zit
De herdesj houte zich zelf werm
Mit ee sjoap op de erm

En die houte in een sjoapevach
In 't sjtelke truj de wach
Zelfs de drij wieze oet 't oeëste
Komme mit gesjenke en toeëste
De sjter blief boave 't sjtelke hange
En deed zoeë alle gaste ontvange

Jan van Haaf

krismes

V'r herdinke mit de krismes dat Jezus Christus is geboare,
Doeër dat te doen wete v'r dat v'r nog neet zunt verloare!
Es v'r rond 't vredige tafereel rond d'r krissjtal zitte,
Is 't good es v'r ins hieël good op de boodsjap zouwe litte.

De boodsjap van krismes is ooch: vrede op dis welt,
Loate v'r os verdrage en neet ummer mit veuël geweld,
Stjrieje vuur os geliek of 't ummer mieër mach kriegende geld,
Jiëdere is geliek, es v'r dat allemoal beseffe is d'r een beëtere welt!

Ron Logister

"Vrede op aarde"

Hoerberding en Servoas zunt al mieë es viertig joar getrouwd. Servoas wirkde vreuger oppe koel en noaheër in de boew. Noe is heë al versjeije joare heem. Heë is nog mer alleen mit Hoerberding, de kinjer zunt nuij de boet oet. En ze hubbe ooch al zieëve kleenkinjer. Mit de krismes komme die allemoal tegelijk op heem aa. Dan is 't mich inne wille kroam! Went de daag om zunt, dan hubbe Servoas en Hoerberding de kneup aaf en hubbe 'n paar daag nuëdig om bieje te komme. En 't is neet alleen de drukte op die daag, ooch 't gedeuns dervuur is get wat ene miensj kapot makt. De hut mot verseerd weëre, de ouwe kamerdusj mit sjteul van de zulder aafgehoald were en de divan en de rooksjtoul noa der sjtal i. En dan dat gesjips vuur 't eëte der kroam in de boete hoale, doa geet 'n peërd kapot aa. Servoas en Hoerberding zunt der weëke mit bezig.

't Begint der mit dat Hoerberding noa de Allerhillige al begint te jieëmere: "Wat mot ich make, wat hubbe de kinjer geer. En dat it kleen Frenske neet, en dat maag Liza neet hubbe en doa mot Joske van keuëke. En 't zint toch zoeëveuël man." Servoas wurdt doa op den doer garetig van en zeët: "Maak 'n buut kouw sjtittel en doog der bruëdjies bieje... veërdig!" "Dat geet neet went die van os Tien eëte dat neet, en Sjarel zag dis weëke al dat knien in 't zoer zoeë lekker is", mint Hoerberding. "Loat doe dich ooch nog get besjtille! Ze eëte mer wat op gen dusj kumt, angesj make ze zich mer 'n sjmauer!" zeët Servoas koad. De ieësjte fundamente vuur ene onruijige advent zunt gelag.

Biej tied en wiele kumt de krismiddig ter sjproake en ummer hubbe Servoas en Hoerberding zich in de wol. Grauwelendteëre were de boodsjappe gedoan, knotterend oetgepak en 't is 'n sjelleriej weë 't sjood is dat de gouw botter vergeëte is. Dan is 't 24 december tied dat de krisverseëring gemak wurdt. Servoas sjlijpt der krisboom 't sjtelke i en sjtuët geliek 'n imaaksglaas mit neëgel om. Heë zeët get wat neet bieje ene krisboom past en sjtuët de sjerve en neëgel onge de wirkbank in. Mit get sjtukker keëper sjleet heë 'n kruuts onge der boom en kleënt zich zoeë geluijetig op inne doem dat de vloek drij sjtroate wiejer te huëre is. "Hils-te de moel" zeët Hoerberding; "Mot de ganse sjtroat huëre dats-te te sjtom bis om te tummere!". En ze geëve zich onger ee va katoen, zoeëwie dat de litste weëke get te veuël gebuërd. En Servoas begint te koake.

Oppe lange litste heët heë toch ´n kruuts onge der boom zitte en heë sjlipt heuëm noa binne. Went heë mit de tek langs de moeëre sjtriekt keëkt Hoeberding dat heë mot oetkieke vuur de foto van de mam. Mer ... te laat. Oma kleddert mit veuël beheij van de moer aaf op gen eërd. "Noe kiek wats-te gedoan hubs" keëkt Hoeberding. "Ich hub toch umer gezag dat die mit heuër lank gezich doa in de weëg hinkt" gieëf Servoas truuk. Wus kleënt heë der boom mit ´t kruuts op gen eërd. "Sjteet sjeef", zeët Hoeberding. "Leck mich am Ash" zeët Servoas en duujt aan een ziej get beerviltjes dronger. Hoeberding pakt der boom bie ene tak en zeët: "Heë wagtelt waal". "De ieësjte de biste deë mit de kneuëk aan der boom kumt, treë ich vur de sjeëne" groemt Servoas en heë begint de lempkes drin te hange. "Has-te gekieëke of die waal brenne?" vrieëgt Hoeberding. Servoas sjtikt de sjtekker in ´t sjtopcontact en kriet een versupt dat heuëm de hoare rech oppe kop sjoan. "Ich werp deë boom geliek der pleij op" sjrieëft heë. "Drink dich ieësj ´n tas koffie en keul get aaf", zeët Hoeberding.

En went Servoas nuuj lempkes gehaald heët en in der boom gehange heët, liekt ´t effe get ruijiger. Bis dat Hoeberding begint te zevere dat de dieke bul get teveuël bie ee hange en ´t krismenke get hoeëger in der boom kint. Servoas begint zich weer op te drieëje. Ze kriege nog wuërd uëver der piek en sjellenteëre wurdt ´t sjtelke onge der boom gepoat. Went Hoeberding doeër die sjellerie ooch nog ´t vleesj aa brent is der bok vit. Oppe lange litste zit Hoeberding te zumpe aan der kuëkedusj en zit Servoas in der sjtal in de rooksjoal ´n piep te sjwame. "Vrede op aarde" sjalt ´n sjtum doeër der radio.

Wiel Roeselers

Van oud noa nuuj

Aan ´t endj van ´t joar,
Kikt me vaak nog effe trök,
Vuël luuj vilt dat sjwoar,
ziej hoowe minder gelök,

Aan ´t endj van ´t joar,
Kikt me toch effe vuuroet,
En drinkt mè ene jonge kloare,
Op de gezondjheed oet,

De nuuje kalender hingt weer op ziejn auw plek,
En tilt weer tweeëj en vieftig weake,
Mer de plänning vuur ´t nuuje joar hingt nog in wieëj zèk,
En hoape dat de gezondjheed doa geen sjtekske vuur deed sjteake,

Soms vroag me zich aaf, is d`r waal een reë om te fieëste,
Want iejdere daag lieëjste in de gezèt of zuuste op TV,
Dat luuj zich gedroge es bieëste,
En de ermluuj nog ummer gezieën weëre es kudde vieë,

Vieër begine geweuën aan dat nuuje joar,
En wete, Veuël dènger hōbbe v`r in èëge handj,
Mer dinke doa soms neet good uëver noa,
En sjreië waal es ieësjte moord en brandj,

Ich wunsj uch allemoal èè gelökkig nuujjoar,
Een gooi gezondjheed, veuël leefde en gelök,
Maak d`r get sjoëns van, dan vilt alles minder sjwoar,
Dan kan vuur uch dat nuuje joar neet mieë sjtök.

Jan Theunissen

Vrassje mèt nuuj-joar

Dat vrassje woar vreuger gans angesj es huijtsendaags. Jieëdereë vrasjde zich en went 't effe ging, moeësj men zich eene (of mieë) drènke `op 't nuujt joar. Omdat pap bieje 't woeëningbeheer van de Emma wirkde, keem hae bieje veuël luuj uuëver de vloer. Daags noa nuuj-joar kreeg hae natuurlik de nuuëdige sjnepskes of glaazer beer aageboa.

Went hae dan noa sjech op heem aa keem, koeësj men dat good aan 'm zieë en ooch huuëre. Normaal kleijde hae zich òm bieje de luuj woeë hae wirkde en dòng zich de witte uuëveral uuëver de kleijer aa. Mer ieësj woeërte de boeksje-pieëpe van de "gòw" boeksj òm de been gedrieëd en in de zökke gedujd. Mèt nuuj-joar - went hae fòsj gevrast haw - vergoot hae òm de boeksj oeët de zökke te trèkke. Mam zoog dan direk wieje laat 't woar.

Lej Dohmen

Nuijoar

Ee nuijoar kinst-te beginne
Mit de sjunste kleier aa
Dat is waalrichtig gemuutlig
Mar doa hast te zoeë wenig aa

Ee nuijoar kinst-te beginne
Mit ing groeëte tuut mit geld
Mar dat hat wieëneg weëd
Es ginne va dich hélt

Ee nuijoar kinst-te beginne
Mit ee sjoeën gleëske wien
Mar es 't leeg is, wat dan nog?
D'r zal waal get beëters zieë

Ee nuijoar kinst-te beginne
Mit ee gans sjoeën gedich
Mer 't betste is nog ummer
Ee begin mit ee vroeë gezich

Jan Halmans

Wunsj vuur de fieësdaag en 't nuje joar

Vieër wunsje uch allemoal sjoëne fieësdaag,
Dat 't uch allemoal veuël bringe maag.
Vuur 't nuje joar nieks dan good,
Verlees in jieëder geval neet de mood.
't Belangriekste is toch een goeije gezondjheed op de welt,
Vieër hoape dan och dat die vuur uch allemoal is besjilt!

En vuur sjtrak: inne hieële sjoëne vastelaovesdied,
Geneet d'r van, want wat-ste gehad has, rak-ste noeëts mieër kwiet!

Ron Logister.